



Diamars
6 di November 2007
www.awemainta.com
Margrietstraat #3, Oranjestad, Aruba
Tel: 583-1400
Fax: 583-1444
Email: noticia@awemainta.com
Prijs: Afl. 1,50

William R. (Bill) Klesse
CEO y Presidente Valero Energy Corp.

CELEBRACION

a keda bautisa y a cuminsa celebra 40 aña di existencia di Grupo di Betico



DIADOMINGO atardi tabatin un “holgorio” chiquito organisa relaciona cu introduccion y bautizo di e disco compacto nobo: Celebracion di Grupo Betico Croes. E bautizo a tuma lugar pa sra. Ada y Maiky Croes, kendenan hunto cu Gus Oduber, autor di varios di e cancionnan, a haci esaki den un forma unico, esta cu awa di coco. Esaki a tuma lugar na residencia di Ada y Maiky Croes. Tur esaki ta bin na vispera di nan 40 aniversario cu ta wordo celebra otro aña. E cd nobo aki, Celebracion ta di 5 produccion di Grupo di Betico y cu a wordo realisa den un periodo di 6 luna cu hopi amor y cariño pa nos pueblo amante di su cultura y folklore.

Celebracion, e di 5 produccion di Grupo di Betico, y asina a cuminsa celebra nan 40 aña di existencia

AWEMAINTA tabata tes-tigo diadomingo atardi na un "holgorio" chiquito cu a keda organisa relaciona cu introduccion y bautizo di e disco compacto nobo: Celebracion di Grupo Betico Croes.

Esaki a tuma lugar na residencia di sr. Maiky Croes.

Tur esaki ta bin na vispera di nan 40 aniversario cu ta wordo celebra otro aña. E cd nobo aki, Celebracion ta di 5 produccion di Grupo di Betico y cu a wordo realisa den un periodo di 6 luna cu hopi amor y cariño pa nos pueblo amante di su cultura y folklore.

Cu inmenso sentimiento di gratitud, Grupo di Betico a reconoce tur esnan cu a sa di apoya nan y a haci nan prome cd-nan un exito. E cd-nan tabata Paranda Arubiano, Tradicion, Alegria y Libertad. Grupo di Betico, ta un agrupacion familiar cu raiznan musical y cultural profundamente Arubano. E herencia musical di famia Croes ta uno cu a wordo pasa di generacion pa generacion. Desde comienzo di siglo 20, den e hogar di famianan Croes na Santa Cruz,

musica tabata un forma di expresion y entretenimiento.

Na cas di Francisco "Panchico" Croes y Maria Luisa "Mimita" Croes Lopez, for di chiquito e yiunan por a aprecia y admira e dushi musica tipico Arubano cu tabata ser treci pa familiar-nan musico manera entre otro Mo Tito y su Conhunto Folclorico Arubano. Den cas semper tabata reina e ambiente musical y por lo tanto cada un di e yiunan di Don Pancho y Mimita a lanta ta canta of toca un of otro instrumento musical.

Na aña 1959 momento cu nan yiu Betico a regresa Aruba despues di a termina su estudionan na Hulanda, el'a motiva su rumannan pa rebiba y continua cu e tradicional paranda familiar di fin di aña. Despues di misa di Pasco mainta su paranda tabata pasa di famia pa famia. Betico tocando su sonfonia di man (acordeon) mientras cu e otro rumannan tabata canta of toca un instrumento.

Betico tabata percura pa e paranda di Dande tur aña pasa den cada skina di nos

isla bishitando famia, amigo y conocirnan. Betico y su Grupo a participa na tur festival di Dande desde su inicio den e decada di añanan 70, cu excepcion di algun biaha cu pa motibo di luto e grupo no por tabata presente. Betico tabata tin un amor grandi pa e folklore y cultura di su isla y tabata entrega tur su esfuerso pa promove e musica tipico Arubano.

Na aña 1986, despues di e fayecimento di Betico, e grupo a dicidi di continua cu e tradicion familiar aki na su honor. Betico na mas cu un ocasion a expresa e deseo ferviente di mira nos folklore y cultura sigui florece y cu generacion-nan di futuro por keda apreci'e y conserv'e. N'e momento ei e grupo a tuma e decision di cambia e nomber pa Grupo di Betico.

Bautizo di e cd nobo aki, Celebracion tabata na man di Gos Oduber, bahista di e grupo, ta compositor di mayoria di e canticanan cu ta aparece riba e produccion aki, kende hunto cu Maiky y Ada Croes a haci



esaki cu awa di coco.

Actualmente Grupo Di Betico ta consisti di e rumannan Tommy (cuarta y canto), Rudy (percusion y canto), y Aiky (percusion y canto), Leoncio (guitar y canto), Hildward (sonfonia di man y canto), Maikito (percusion y canto), y Maiky Croes (percusion y canto), Rudney Lopez (percusion y canto), Gos (guitar baho y canto), Dennis (percusion y canto), y Rigo Oduber (guitar y canto), y Ruben Werleman (cuarta y canto).

Grupo di Betico ta ser considera patrimonio cultural nacional Arubano y esei ta keda comproba mediante e cariño y aprecio cu e pueblo di Aruba semper ta demostra p'e grupo musical procedente di un famia humilde di Santa Cruz.

AWEMainta
 Nos e-mail:
noticia@awemainta.com
Tel: 583-1400
Fax: 583-1444